

اوقیانوسا باخان کلبه

چئورین: لاله جوانشیر

فیلمده کی قادین ائوینی ساتدی، اشبالارینی دا. پالتارلارینی و اونا خیانت ائدن کیشی نین یادگارلارینی بیر آشغال تورباسینا دولدوروب خیابان باشینداکی آشغال قابینا آتدی. دئدیم "حیف". پالتارلارین هامیسی تزه ایدی. ائله بیل کارگردان سسیمی ائشیتدی کی توربالارین اوستونه زوم ائله دی. سونرا بیرینی یوللادی توربالارین باشینا. بو ایشی منی راضی سالدی. ائله بیل توربالارین باشینا گئدن من اؤزومدوم.

قادین بوتون مالینی پولا چئویردی. وار یوخونو دا بالاجا بیر چانتایا دولدوروب یولا دوشدو. اؤزوندن بیر ایز قویمادی. آنجاق اوشاقلیق دوستونا دئدی کی گئدیر. گتتمه میشدن قاباق دا بیر نئچه گونلوک یاشلی آناسینین یانیندا قالدی. سونرا هئی قاطاردا ایدی و دوربین، قیسا بیر صحبتدن سونرا موبایلینی ده توالته آندیغینی گؤستردی. بوتون دونیا ایله علاقه سینی کسدی.

اؤز اؤزومه دئدیم ائلییه بیلمز. دؤنه جک. اصلا ائلییه بیلمز بئله گتتسین. یعنی گتسه ده فایداسی یوخدور. حافظه سی ایله، خاطیره لری ایله نئیه یه جک. بو قدر راحت اولسایدی هامی گئردی. هر آن گؤزله بیردیم باشینا بیر ایش گله، باشی داشا ده یه و قاییدا. بو قدر یالینزلیق منی قورخودوردو.

اما او بیر قاطاردان ائیب باشقاسینا مینیردی. شهردن شهره گئدیردی. گتجه لری تک یاتیر، بعضا ده داشلانیب دوروردو یوخودان. سونوندا بیر تپه نین باشیندا اوقیانوسا باخان بیر کلبه تاپیب اورداجا قالدی. هر گون اوزمه یه گئدیردی. یاپا یالینز.

یاواش یاواش بو قادینین الیندن حیرص چکمه یه باشلا بیردیم. گتجه گوندوز اوزو اوقیانوسا اوتوروردو و تک دیلخوشلوغو هر دن سویا آتیلیب اوزمک ایدی. چوخ کئفی ساز ایدی. اما دئییلدی. بیر دفعه دئدی: "بئله دونیا یا لعنت اولسون" سونرا دا اوزونو آتدی یاتیغی نین اوستونه. آغ ملفه لر آلتیندا قیریشدی لار. دئدیم بو قادینین قاییدیب هامی آداملار کیمی یاشاماقدان باشقا چاره سی یوخدور. یعنی یئنه ائو آمالی، عاشیق اولمالی، آناسینین یانینا گتتمه لی و هامی نین گؤردویو ایشلردن گؤرمه لی دیر.

گؤزله بیردیم کی کارگردان قادینی حیاتلا باریشدیرسین. دونیا یا کوس اولمانین اوجو بوجاغی یوخیدی. یعنی ایچیندن هئچ نه چیخمیردی. بونو داها آز کوسمه یه باشلا دیغیم زامانلاردا آنلادیم. بیلیردیم، بیر نئچه ساعات، نئچه گون، یادا نئچه آی سونرا باریشماغا مجبوردم. اؤزومله عهد ائله دیم، آنجاق باریشماقدان کسین واز کئچه بیلدیگیم زامان دوغوردان کوسه جکدیم. یاواش یاواش فیلم دقتیمی چکمه یه باشلامیشدی. دوشونوردوم بلکه کوسمه بین ده اوجو بوجاغی اولای بیله. یعنی بلکه کوسمکله ده بیر شئیلر اولای من بیلیمیرم.

قادین گئری دؤنمه یه مجبور اولدو چونکو آناسی اؤلموشدو. اؤز اؤزومه دئدیم بویور. بودا بیر بهانه کی قادین قاییتسین اولکی یئرینه. اما آناسینی باسدیراندان سونرا قادین یئنه ده ایسته دی قاییدا گنده او تپه نین باشینداکی کلبه یه، او سس سیزلیگی و تکلیگی انسانین ایچینه قورغو چؤکدورن یئرله. اوشاقلیق دوستو اوندان قالماسینی

ایستہدی. بیر کیشی واردی. دوشوندم بلکہ قادینین دقتی نی چکہ. اما قادین دندی کی گرک گئده. یئنه ده قادینین الیندن حیرص چکمه یه باشلادیم. چوخ راحت گئتمه یه قرار وئیردی. فیلمدن بیر ساعات کئچمیشدی اما کارگردان هله هئچ بیر ایش گؤرمه میشدی. قادین گئندی اوقیانوس قیراغینداکی کلبه یه. دوربین ده اونولا گئندی. سونرا دوربین ایکی قانادی ایچریدن اوقیانوسا آچیلان پنجره نین اوستونده دوردو. یاواش یاواش قادینین بیر نفسده ایچینه آلدیغی هاوا، او قدر رنگ و آیدینلیق خوشوم گلمه یه باشلایردی. اوره یه یاتیم بیر سس حزین حزین سویون قیراغیندان قالخیب دالغالارین شاهلانماسی ایله اوجالماغا باشلادی. اوره ییم بیر کز داها کلبه یه دؤنمک ایستہدی. هر شئی او یوخاریدان گؤرمک ایستہ ییردیم. بو دؤنه کارگردان سسیمی ائشیتمه دی و فیلمی اوقیانوسون اورتاسیندا آغ بیر قوشون قانادیندا بیتیردی.